

四庫全書

集部

欽定四庫全書

屏山集卷十一

宋 劉子翬 撰

詩

弔史

禽彈繁弱棄兔盡韓盧烹英雄起乘時時徂力難爭精
魂閉尺穴壯骨颺飛塵淒涼千載下間氣凜如生羸秦
失其鹿圖王各崢嶸斯人顧盼間漢楚分重輕臣雖替
末路君亦寒初盟豈不念疇昔百戰同艱辛誰云漢網

疎豪俊屢拂縈高蹈欣繁鮮括囊聞飲醇

雙樹

猗猗映門樹團團若雙蓋微風薄層霄髣髴鬬清籟
遙步其下秀色吾所愛秋來霜葉紅飄落不相待

懷致中

夢覺殘夜永山寒氣逾清林幽萬籟息月出虛堂明披
衣坐復起懷人思空盈經時不對面素榻浮埃生遙知
念盍簪臨風亦闕情褰帷望岐路慨然欲宵征無人導

我先何因識門庭仰憑鴻鴈飛書詞寫深誠詞多意莫
宣益遣幽恨并

棄竹夫人

愛憎情易遷感物思鬱紆念昔未棄捐嘗侍君子居煩
襟一披豁雅抱何清虛蹉跎怨時暮涼德竟見疎飛霜
皓中庭枵然委墻隅的皪珠幃深熒煌錦茵鋪豈不懷
舊恩君心已非初當年紈扇謠抱恨同區區

江山突星石士特欲易為獨醒有詩因次其韻

羣石翠參錯，茲峯峙雲林。
突星名固夸，流傳經古今。
幽姿儼向背，異態生晴陰。
怒若抽翠筍，端如立瑤簪。
不有融結奇，寧知化工深。
翁郎丘壑人，籃輿越秋岑。
崎嶇喪亂間，逢幽亦登臨。
把酒視雲漢，浩歌散愁襟。
著鞭雖後余，歸蹤畧相尋。
獨醒訂訛謬，懷人識君心。
政恐五字詩，光芒射奎參。
玩味不可忘，寫之朱絲琴。

秋懷

哲人嘆逝川，志士悲廩秋。
流光不暫停，忽忽歲欲周。
涼

颶襲迥野飛霜皓盈疇華林失鮮輝奔谿殺湍流萬化
倘日徂吾生難獨留而我苦不樂傍徨復何求世途多
軌轍今行非昔謀徒遵耿耿意齟齬固莫投時乎不再
來豈余敢懷尤王道炳日星歷騁疲軻邱歸與既改旆
浩然亦回輶寂寞窳子歌棲遲長卿遊客嘲徒自解天
問終不酬長揖未免烹說難竟遭囚行藏或大謬聖賢
共悠悠舍思疚憤積念往川途脩煌煌青春姿蹉跎恐
茲由諒非宏達觀那能齊百憂

四不忍

草邊飛騎如烟滅
拉獸摧斑食其血
此時疾首念鑾輿
玉體能勝飢渴無
危城屑麴驚雲擾
簋簋無光天座杳
奮戈倘未雪深讎
我食雖甘何忍飽

黃河鑿鑿冰成路
人語寒空氣成霧
此時泣血念鑾輿
玉體能勝凜冽無
蒼黃天步蒙塵去
畫袞飄零傷歲暮
飛書倘未伐姦謀
我服雖華何忍御

平沙月轉旌旗影
擐甲為衾戈作枕
此時飲恨念鑾輿

玉體能勝暴露無問安使者空相繼清蹕不回宮殿閉
請纓倘未縛首渠我榻雖安何忍寐

漁陽疊鼓風沙戰潑水淋漓舞胡旋此時太息念鑾輿
玉體能勝寂寞無六宮遭亂多奔迸不復梨園歌舞盛
着鞭倘未蹂龍庭我瑟雖調何忍聽

雲際贈施子

驚沙慘淡連雲起曳杖悲歌行復止春城是處聞鼓鼙
好風依舊開桃李對花惆悵忽逢君把酒無懽如啜水

六年喪亂兩相見世路艱難嗟若此江邊盜賊真遊魂
挾虜聲援圖併吞金陵失守數騎入會稽移蹕千官奔
只今州縣多阻絕消息時聽行路說百川背海欲西流
八柱撐天愁更折符堅陣亂邱山摧夜聞鶴唳猶驚猜
莫輕赤壁一炬火曹瞞氣焰隨飛灰功名邂逅有快意
豈在今日無人哉天方稔禍秘豪傑故遣君輩多沉埋
亦知興衰運有極天時一半因人力男兒遇事不作難
看君赤手排荊棘

望京謠

雙鑾北狩淹歸轂寂寞梁園春草綠猶傳故老守孤城
官軍不到黃河曲連雲樓櫓已灰燼更倚窓扉防箭鏃
招兵大半出羣盜繡襦蒙衣屢翻覆前宗後杜力誅鉏
白刃如霜挂人肉州橋燈火夜無光夾道狐狸晝相逐
往時汴泗絕行舟市糶十千塵滿斛衣冠避胡多在南
胡馬却食江南粟謀臣武士力俱困海角飄搖轉黃屋
盤庚五遷方擇利昆陽一戰何當卜寧聞強虜亂中華

漢祚承天終必復夕烽明處望千門孤臣祇欲吞聲哭
詩寄懶菴兼簡士特溫其原仲致中昆季

懶翁疎散無與儔結菴名懶山之幽蕭然杖屨巖壑裏
似是當年嵇阮流云何出處戾初志束書負劍俄西遊
悲猿攀車鶴卧轍去意勇決誰能留菴垂鐵鎖人跡斷
破窓鳴紙風颭颭曳裾我昔翁門客豈知繼踵居翁室
閭里應記往還頻猿鶴乍驚賓主易爾來庭戶已更創
尚榜翁名志陳跡傍菴小樹昔親栽鑿沼今遷在簷北

我山亭闕舊墻東此景新成翁未識遙知捧檄遵歸途
摘山官况今何如書來頗厭作吏冗俸祿僅可供妻孥
趨庭日一見官長脚靴手板常睢盱簿書有程那得懶
却視故隱真蘆廬寄聲頻慰吾人望往時交友皆無恙
鷺峯諸劉更互來清湖居士時相訪中郎司戶又繼歸
酒社文盟氣增壯我慚淺拙難強陪每憶翁才真輩行
拂衣早赴竹林期莫遣移文重前謗

遊龍潭

四客同笑言一僧陪杖屨徜徉山水窟適意忘晨暮疎
鐘巖北寺細竹溪南路中流石參錯不礙潺湲注泓澄
小龍潭潤氣金碧聚時驚木葉墜俯見魚蝦度斯遊非
預期偶爾造佳處幼輿邱壑情陶令琴觴趣淹留慰所
願惟以賓友故夕陽淡寒山遲回不能去

田家

長空淡淡如雲掃暮過田家風物好耕犁倚戶寂無人
飢牛卧齧牆根草

沙頭

沙頭鷗鷺寒相傍
老樹槃跚枝拂浪
前村急雨漲灘流
日暮漁舟撐不上

臨池歌

劉致思倦遊復卧故廬
有意學書求石刻
因慨然念昔經行秦洛
趙魏間未嘗不回驂
駐軫搜訪古跡
故宮遺址豐碑斷碣
厯厯相望也
吹埃剔蘚考年代之所志
訂古驗今識興衰之所自
至乃壞

壠荒榛微陽霧雨雖暴露濡沐僮僕色難而余躊
蹰不忍去竒蹤偉筆多致墨本甚者缺裂模糊不
可辨了亦皆摸脫以歸登登之聲殷乎山谷積歸
所獲車載牛負不可勝計喪亂以來汎掃焚書何
止七厄哉今披篋視之十得一二有副本者輒以
與致思致思明爽嘗留心字學運筆流快風行草
偃固足以軒輊流輩然未能窺前人藩域者功虧
一簣耳夫洞石仆木非踈張挽强者所能用志不

分乃凝於神梓慶削鐻病癘承蜩皆此道也致思
充是而學焉余不知其所至矣因作臨池歌以堅
其志切切惻惻亦朋友之義也

君不見鍾繇學書夜不眠以指畫字衣皆穿當時尺牘
來鄴下錦標玉軸爭流傳又不見魯公得法屋漏雨意
象咄咄凌千古斷碑零落翠苔封直氣英風猶可覩元
常獨步黃初際清臣後出今無繼風神迴出本天資巧
力亦自精勤至羨君好尚何高竒寒窓弄筆手生胝向

來失計墮塵網銳氣直欲摩雲飛男兒舌在心何忤却
擬臨池尋舊學要須筆外見鍾顏會自蛟龍生掌握銀
鈎石刻余何愛勸以短歌君勿忘他時八體妙有餘此
歌倘可君紳書

和李吳伯春懷

山寒古寺清斷續春朝雨遙憐遠客情寂寞誰晤語平
生氣軒昂失意今易與有酒即佳晨無兵皆樂土微吟
對節物林靜幽花吐悠悠念鄉邑耿耿悲豺虎知有濟

時才縱橫在談麈功名恐未遲老駟期更舉

明皇九馬圖

書生兀兀園不窺見馬豈辨騮與騅開圖九駿立突兀
摸捺知是真龍兒奔雷蹴踏原野動曳練參錯風沙隨
華纓金絡豈不好矯首奮迅那容羈吾聞取驥如擇士
競愛妥帖驚權奇士懷惆儻衆論斥馬有顓頊羣鴛欺
六閑泰養固恩厚橫氣摧折常鳴悲丹青倘不逢妙手
萬世豈識真龍姿因思中原政格鬪鐵騎倏忽銀山移

著鞭安得致此物掩畫四顧徒歔歔

怨女曲

空原悲風吹苜蓿胡兒飲馬桑乾曲誰家女子在羶城
烏烏夜看星河哭黃金為閨玉為宇平生不出人稀覩
父憐母惜呼小名擇對華門未輕許干戈漂蕩身如寄
綠鬢朱顏反為累朝從獵騎草邊遊暮逐戎王沙上醉
西鄰小姑亦被虜貧賤思家心更苦隨身只有嫁時衣
生死同為泉下土出門有路歸無期不歸長愁歸亦悲

女身軟弱難自主壯士從姑不如女

防江行五首

朝來殺氣秋千里無立草翩翩黑幟飛結壘天長道獵
罷楚天寒黃雲淡如掃

漢家飛將雄夜戰蕪城北雙刀斫盡剋月暗穿圍出低
頭拔胡箭却向胡軍射

寒烽隔水明虜意猶叵測君王自臨戎萬騎隨清蹕士
氣薄層霄挽槍夜無色

江邊五色旗分揔期門士驚砂雜雪飛日暮孤城閉寂
寞良將風誰識投醪意

樓船動滄江江晴鼓聲發男兒取封侯赴敵如飢渴腰
懸李董頭長歌獻金闕

和安汝功採紫竹杖篇

赤藤表珍奇桃枝寄吟翫高情在邱壑微物懷深睠徵
工匠遠林彌山選一幹雲根傍崖蹙樵色涵霜變匪憑
精刃揮根柢難立斷慙慙為摩撫晞晞光浮爛觸石聲

涵鐘憚波影搖電矧余疲曳娑假力斯過半皇皇駟馬
威秦趙昔臨按胡為步槃跚猥逐漁樵伴千金一顧重
朽質增華煥不經提携手棄擲亦何算夙懷用舍情感
茲長發歎

贈宗周賓

我車南君車北相逢總是天涯客擁爐談笑一燈殘出
門風雨千山隔

涪淡灘

南來甌粵無平陸林巒起翠波騰綠扶輿政恐犯霜露
買舟尚可休僮僕清灘白晝雷霆作亂石驚湍犬牙錯
平生珍重金軀舟子一篙那可託飄搖葉樣勢轉急
釜竈傾頽不能立眼看白浪散銀山蛟螭百怪堂堂出
人皆乘險欲趨舟我不安行悔何及吁嗟世路風波猛
巧弄危機暗馳騁江湖溺舟猶自戒勢利溺人終莫省
矯情鎮物未足言書此聊為後來警

巡寨偶書

窮寇轉趨海吾邦備宜先連年戍役煩徵兵及漁佃扶
戈或推齒嬰胄仍革顛未知戎伍肅朱旗亂長阡林端
晚燧發石際飛梯懸崎嶇樵牧地萬竈生浮烟我行視
營柵兒戲端可憐倚茲形勢險寇至常遷延羣克昔吾
軍赤指抨鳴弦防胡屢瓦解合寇俄星連猶多燕趙兒
意氣非當年駢車載珍寶結騎馳婁娟時危天稔亂事
豈汝能專怒風飛驚濤河梁失歸船四顧天地黑攬衣
思茫然

次韻蔡學士梅詩

梅梢破白香清切晴雨含春不成雪瑤池鬢髻萬妃遊
縞裘練帨何鮮潔凌晨燦爛忽驚眼客中又過嘉平月
年年見梅非昔地海角尋芳更愁絕多情欲伴曉雲飛
有恨只教啼鳥說兵厨況是酒如澠東閣喜聽談吐屑
飄零使我懽意盡山城暮角聲嗚咽庭邊一樹春寂晚
照影遙憐水方折暫忙不到今幾時南北枝頭開又歇
新辭婉媚發春妍未害廣平心似鐵

禱雨蟹泉

厭旱訟風伯苦雨誅雲師天公良獨難爾民多怨咨夏
潦包原隰苗端漲清漪冬暄但流塵土堅不啻犁陰陽
有乘除此理固可推惟神執天權憫物思濟之穴泉類
蹄跡幽靈隱其涯髣髴小雙螯控御蛟龍隨名居列曜
尊箕畢可指撝顧匪郭索倫嘗辱左手持滂沱為一縱
豈惟潤東菑灑灑燠氣清浮浮瘴烟披將聞鼓腹謠寧
求折肱醫寸澤垂二惠此功神所尸遥知青青麥春風

滿陵陂吾儕飽湯餅敢後椒漿期

負暄

宵寒卧增裯晝寒起增衣何如負暄樂高堂日暉暉引
光扉盡闢追影榻屢移妙趣久乃酣瞑目潛自知初如
擁紅爐凍粟消頑肌漸如飲醇醪暖力中融怡欠伸百
骸舒爬搔隨意為稍回驕佚氣頓改酸寒姿薰然沐慈
仁天恩豈余私願披橫空雲四海同熙熙矯首望扶桑
傾心效園葵

子魚

舊聞通印名海錯珍莫踰火氣爍鱗鬣鹵香泛庖厨泥
泥子盈胞鮮美禍所區生如粒芥微多若囊粟儲他年
想吞舟勿輕此錙銖一咀命千百雖甘汝安無窮冬孚
乳時罩麗海為虛舍凍體猶僵得瀉味已渝虐戲等刳
孕淫刑幾戮孥人深襁褓恩在物愛豈殊閩風易殺子
鹽水沉其軀詎有惻怛心旁推及豚魚相殘人獸均自
殘獸不如哦詩化蠻獠因警饕餮徒

郡圃觀醑醕

憶昔尋春西洛橋，醑醕結洞橫朱架。翠帷銀網一番新，
百萬花頭相枕藉。飄搖羽客靜疑仙，窈窕素娥嬌欲嫁。
細蕤摘貯絳紗囊，撲鼻清香奪蘭麝。論花每恨流品雜，
韻絕江梅此其亞。紛紛紅紫已空條，耿耿冰霜猶照夜。
只今漂泊一身存，海角逢春足悲咤。銀苞翠蓋宛如昨，
瘦骨蒼頭忽驚乍。當時我最推少年，想見同遊更衰謝。
洛陽園苑狐兔生，虜騎時來北。卽下浮生榮悴均有老，

萬古興衰那足訝南鄰地主好襟懷官事稍閑須命駕
急須喚酒賞餘妍惡雨狂風不相借

木犀古風

化工吝幽香斑斑被花木氤氲寒巖桂高韻蓋羣馥無
人盡日芳守志何幽獨士介恥求知女貞慙自鬻淒涼
楚山秋樛枝吐金粟淺水映輕明微颺發含蕾樓端靜
忽聞馬上還相逐踟躕為延佇但見林巒綠鉗罌誰折
贈清芬悶廬屋久處不自知乍至彌鬱郁客悲芳歲暮

夢遶寒溪曲長吟小山詞古意恐難復

食蠣房

蠣房生海壖堅頑宛如石其中儲可欲雖固必生隙嵌
出各包藏礪礪相附積終逢霹靂手妙若啟局鑄鍛灼
諒難堪曷不吐餘瀝南庖富腥盤豈惟此稱持吞航大
絕倫梯鬻萬夫食針鱗九牛毛小嚼亦千百光螺暈紫
斑簞膏湛金色水母脆鳴牙章舉懸疣密烏粘力排界
貼石不可索妾魚戲浮波媚鮐雌雄匹蟹躁輒橫驚鼈

縮常畏出車螯不服箱馬蛟非駿跡江瑤貴一柱嗟豈
棟梁質骨柔競愛鱖多鯁鮒乃斥蚶虹鮓赤文肉黑魚
之賊鰐鰐鯉鯪鰻鮓鮓鮓鮓鮓鮓鮓鮓鮓鮓鮓鮓鮓鮓鮓鮓
包涵知海量長養荷天德貪生族類繁失地波濤窄網
罟人創禍甘鮮已為厄紛然均可口流品當別白微物
倘見知捐軀不足惜

春寒偶書

浮雲匿晨暉雨雹驚春晝天公號令乖陰晴變何驟小

徑踐芳泥通渠走寒溜風顛萬木偃氣凜重幃透鷓鴣
護巢翔奈此羣雛幼擁爐烏薪然雙手慵出袖褰幃望
空明屋角見遙岫良朋不可招塊處慚孤陋青青桃葉
長奕奕蘭花秀長吟曷咨嗟佳晨去難又

荔子歌

炎精孕秀多靈植荔子佳名聞自昔絳囊剖雪出瑇瑁
尋常百果無顏色閩天六月雨初晴星火熒煌耀川澤
欸如彩鳳戲翔翔爛若彤雲堆翕赫中郎裁品三十二

陳紫芳紅冠流匹鹽蒸蜜漬尚絕倫
啄鮮空羨南飛翼
我聞宣和全盛時貢輸不減開元日
涪州距雍已云遠
况此奔馳來海側
繡衣中使動輜車
黃紙封林遍阡陌
浮航走轍空四郡
妙品人間無復得
似聞供御只纖毫
往往盡入公侯宅
驪山廢苑孤兔靜
艮嶽新宮輦鼓急
繁華今古共淒涼
遶樹行吟悲野客
西風刮地戰塵昏
一聽胡笳雙淚滴

屏山集卷十一

欽定四庫全書

屏山集卷十二

宋 劉子翬 撰

詩

法石見李漢老叅政

我識今朝李翰林十年隔絕飛寸心素書每逢雙鯉得
雲路欲倚長梯尋翰林昔叅建炎政想見中興人物盛
方圓齟齬不足論角巾雅有江湖興玉堂草詔褫兇魂
丹陛陳謨發天聽介圭便合趣公還只今密勿才稀并

自憐隨牒東南奔假道因得登龍門怪余髯面益老矣
一笑問勞情彌敦僧坊蕭蕭遠闌闌豈料飄零獲清對
牛行公舊居名尚憶王相宅曩日交遊幾人在濁酒青燈夢
寐間九州四海烟塵內區區王事今有程暫見復別難
為情長亭喚馬一悽斷壁月曉墮桐花城

歸田

聲色家有甯軒裳仕之囚冥行不知迷今將返吾廬愛
慕洗餘習清虛樂孤遊亭亭隱仙巖迎人入雙眸稻色

黃莽莽溪光碧油油佳樹殘照滿高穹亂雲流乍參樵
牧羣辭氣不婉柔性有書史癖時逢甲兵休斯懷倘遂
全曩志不必酬

省拱辰山

豺狼已烟銷言歸省先塋豈無消息至怵惕意自驚兵
戈道孔由不折寸草莖神物陰有護克威肅其穉敬瞻
壠闕雲墮淚睚眦盈如承慈穆顏如聞警咳聲道餘孤
風存澤本遺愛成昔我罹禍苦結廬傍佳城哀慕寧有

極忽忽時序更慚愧舊巢烏常遶松柏鳴

士特贈筆

書成癡傳成癖平生識字真無益筆扛鼎思湧泉何如
蹶張強弩弦管城雅貺情雖重感此艱難拙於用君不
見翠華南渡江江路八百里胡兒飲馬鏡湖邊不逢漢
兵胡自止只今城闕多旌旗報國擬將雕面兒長星吐
碁南掃北轉禍為福須乘時虎頭心事不能已勸君莫
弄毛錐子

諭俗十二首

故園喪亂餘歸來復何有鄰人雖喜在憂悴成老叟為
言寇來時白刃穿田畝驚忙不知路夜踏人屍走屋廬
成飛烟囊橐無暇取匹夫快恩讎王法誰為守艱難歷
冬夏遷徙徧林藪深虞邏寇知兒啼扼其口樹皮為衣
裳樹根作糧糗還家生理盡黑瘦面如狗語翁翁勿悲
禍福較長久東家紅巾郎長大好身手荒荒戰場中頭
白骨先朽

西村人漸歸，撐住燒殘屋。東村但蒿萊，死者無人哭。昔
茲號富穰，被禍尤殘酷。二三里中豪，喪亂身為僂。遺骸
悵莫掩，飢鳶啄其腹。豈無平生時，意氣凌鄉曲。錐刀剝
微利，舞弊欺憚獨。錦囊收地券，奕葉相傳續。只今鄰叟
耕歲歲，輸官穀爾曹。何顓愚人生，固多欲。

何州無戰爭，閩粵禍未銷。或言殺子因厲氣，由此招蠻
貊。地瘠狹，世業患不饒。生女奩分貲，生男野分苗。往往
衣冠門，繼嗣無雙髻。前知飲啄定，妄以人力僥。三綱既

自絕餘澤豈更遙王化久淘漉刑章亦昭昭那無舐犢
慈恩勤愧鴟鴞冤報且勿論茲義古所標

愚氓擾潢池艱難亦常態簪紳有包藏事異吁可怪衆
聲久伺亂鯨戮終何悔游言張兇焰巧謀移機會初如
卵殼微跣踐悉糜碎養成羽翮雄飛掣韝繩外剪鉏淹
歲月蝥毒彌疆界向來詰端由罪白不容蓋南冠囚載
路東市誅其最隆寬俗與新僥倖汝勿再

野人厭羹藜家有庖丁刀徒誇批導手肯念耕稼勞隱

然肉山雄畏彼尺箠操春泥卧寒野夜月犁東皋辛勤
力以盡轂轂禍豈逃誰無惻隱心鮮能勝貪饕蓋惟猶
示恩況異犬馬曹

扇馬嚴內仗貂璫侍宸闈哀哉里閭間刀閹逮雞豚放
魔識忠蓋母卵著格言矧利肥甘軀絕其孳息源難消
愛欲心物物天性存逆情氣必戾順化生乃蕃誰開口
腹謀無乃傷仁恩

粵人多悍驕風聲亦惟舊兒童僅勝衣挾箠相格鬪藝

精氣益橫質化心忘陋家饒喜稱俠世亂甘為寇豈伊
天性然習俗所成就吾聞互鄉童翱翔聖賢園隱豹弄
瀾斑攻駒發馳驟佩觿爾何知義方得無謬

村南井欲乾曉汲盈瓢濁飲濁不足言奈此田畝涸
啞龍骨響煥爛陽烏虐良農無他營辛苦事東作春苗
何葱芊秋刈何稀薄我雖食有餘念彼心不樂乞靈走
羣祀晚電明霍霍屯膏竟未施天意自難度

震雷霹枯松頑龍失其據浮雲三日雨盈畝復他注商

羊舞未休旱魃消何遽稍寬人心切仰荷天恩布稻畦
裹連顛接穗給朝飫菜畦擢新萌蕩滌死羣蠹歲儉民
怨咨時豐家悅豫青青寒芳色亦復貪雨露

茲鄉山水佳昔乃為盜窟吾廬已煨燼荒草墻兀兀墻
東大梨樹惟此為舊物火燒枝葉盡老本更奇崛衆鳥
罷高棲空庭失清樾鄰兒利薪爨往往肆戕伐豈知昂
霄勢長養自毫末寒堤孤碓在廢圃鳴泉出衡茅且經
營霜霰莫倉猝

未須葺吾廬且復修吾倉求安當卜居求飽當聚糧營
生力有限先此計頗長去年稻盈畦避寇不得將新芽
雨後白卧穗霜中黃鰈惇有飢色寇釁餘稻糧解衣易
升斗糠粃隨風揚休嗟昔艱難喜茲歲豐穰鄰翁為人
耕貯粟不盈箱溪頭廩與困纍纍已相望

縣牆挂德音盡弛今年租旄倪發懽謠助達和氣舒皇
恩施甚厚疲瘵望少蘇吁嗟吏舞文詔紙墨未渝借貸
盡白著勾稽窮宿逋培克倘歸公民貧猶樂輸量權徵

倍耗資緣竊其餘寧逢盜剽攘厭聞吏追呼盜姦久必
戢吏姦無由鉏雷霆不言威肉食忍自誣故態勿狃習
窮閭勿侵漁勿謂天聽高勿謂黔首愚

清江行

漁翁一棹老清波稚子學語能漁歌日暮沙頭寒蕪竹
雨餘船角亂堆蓑驚殘小鮮仍自鱸湖海茫茫醉鄉內
夜闌酒渴漱寒流月照蘆花上蓬背

聽詹溫之彈琴歌

鳴琴藝精非小道可惜溫之今已老玲琅一鼓萬象春
鐵面霜髯不枯槁自言寡知音求我為作歌號宮韻角
可聽不可狀錦腸繡舌空吟哦吾意其一氣之清濁兩
曜之晦明山河之結融雷霆風雨之震驚包羅具七絃
開闔造化由人心又疑夫堯禹之躬行丘軻之立言瞿
聃之同歸百家諸子之紛然更厯千萬古此意不滅絲
桐間滌除浮慮清蕩摩愁襟開琴之氣象廣如此欲媚
俗耳知難哉寒缸燒涸夜向闌罷琴歸矣我欲眠夢跨

冰輪出瑤海一笑碌碌瀛洲仙

鵞峯居士以地黃遺病翁因為作引

君不見咸陽之原涇渭之間靈苗叢生綠芊綿春風莽
莽膠晴烟天馬嚼齧黃金涎渴噴清浪香浮川年深駿
足宵騰邁目有神光破昏昧方經誇異倘不誣伊人服
之功必倍君家種藥南山隅紫花褐實連庭除長鑱斲
掘動雲壤婉婉盡拔生龍鬚飲之清醪觀其德宛如君
子彌溫克浮沉詎恤世論量蒸曝益見中腴澤我年三

十號病翁空齋藥杵聲瓏冬未能醫國慚君賜舊書且
讀蠅頭字

萊孫歌

屯田詞考功詩白水之白鍾此奇鉤章棘句凌萬象逸
興高情俱一時耆卿骨朽士特死澗谷錯莫無晶輝後
生俊秀何其寡吾宗喜有萊孫者雙瞳點漆面如水一
見使我心神寫讀書已通經學賦已知律尺今年十三
吐氣成五色驪珠出海夜生光突竒流弦追莫及人材

有價誰能私不妨乃翁聊譽兒囊中彩筆今付汝往繼
二妙聲名馳

夢仙謠

并引

劉致明夢與七客遊仙胡原仲與焉其事甚異致明
清修純實非夸誕人也因為作謠以記之他時二人
凌虛誦此謠當懷所謂病翁者耶

鷺子峯前波色清劉郎看山無俗情癯儒自昔有仙骨
夜夢體飛如葉輕雲中不識朝天路雙童導我凌空去

側身度巖隈盤盤復回回
翛然意往形不礙石窟辭
實俄天開乘槎夜泛牛女
渡鞭鸞曉入金銀臺花深
不逢人時聞佩環聲仙翁
睡起方結襪見客坦易無
崖垠擊蒙冀垂矜叩妙獲
一言七情汨心心憤昏室
欲如水澄其源曰中咬咀藥
手撮仍見分旁有泠泠泉三
漱乃盡吞駐紅却白非難事
貪生慮死真愚計當時同遊
七姓俱但記古月成胡字塵
緣未斷不得畱海風吹過蓬
瀛洲覺來窓戶冥濛曉玉鏡
晶晶墮松杪

雲際會劉致中

紅綃千樹桃雪穀萬株李柘葉青青如鼠耳橫山渡口
浪成堆認得劉郎船子來物情時事不須說且喜新歲
同啻杯少年鼻哂輕流俗斂銳收豪今碌碌敝裘常帶
客塵緇雙鬢不如春草綠東風吹愁入我心使我嘯嘆
成悲吟問君底事久畱此曷不聯鑣歸故林

懷舊歌

黃茅生烟暗村落浩歌無復當時樂鄰家酒熟逆鼻香

一醉乾坤墮冥漠尋芳屢過垂玉軒
義魚夜上浮清閣
鬪牌擊鼓多伎倆我獨旁觀惟大噓
驚烽入座歡難保
幸得身存他勿道吾宗潛武卧空棺
哀臣兄弟埋荒草
當時醉舞向花下綠鬢朱顏各鮮好
隙駒風燭尚須臾
數子凋零不待老死生細事從渠天
莫學兒女相哀憐
一窓容膝可終隱冠盜擾擾今連年
王師誅鉏有漏網
死灰焰焰猶思然憂煎過計祇自惱
且但努力耕吾田

夜過王勉仲家宿酒數行為作此歌

遙林帶雪迷村疇伶俚一馬行無伴故人家住丁坂頭
停驂邂逅成清欸犯寒知我猶空腹地爐然薪架紅玉
花瓷湯酒欲生香竹外庖厨聞剝肉夫君不有中饋賢
咄嗟辦此何神速酒酣意氣悲荆棘尚憶朱甍舊時宅
豺狼得志竟何成至今人骨如霜白亂離少有闔門在
漂蕩俄驚五年隔數畝荒田已失耕一間茅屋仍畱客
客情主意懽難盡短臘窮冬春欲近明朝分手更愁人
且覆清觴莫畱賸

夏日吟

君不見長安公侯家六月不知暑
扇車起長風冰檻漚
寒雨重欄邃屋晝生陰
反易天時在談吐
又不見五陵
富豪兒炎天多快意
雪穀曳輕明
珍盤嚼甘脆
蛾眉皓齒發清歌
灑酒筠枝集蠅蚋
何如野客歌滄浪
萬事不理心
清涼流金鑠石未為苦
勢利如火焚中腸

萊孫求墨并以詩與之

何年老烏龍排山折其角
漁人網得之澄淵
起雷電異

物世常猜神光夜潛覺流傳歲月深質槁紋斑剝漆簡
射晶熒玄主靡雕琢孰謂喬松煙能成此堅確晴窓試
墨池雲霧生掌握只恐化蜿蜒飛騰入冥邈萊孫真可
兒句法有家學贈汝囊中珍慚余鼻端斲

劉致中惠瓜

炎熇氣如焚塊坐惟兀兀劉侯惠甘瓜胸次瀉溟渤豐
膚素浪浮翠理霜刀剗因思少年時窺園步清樾百金
酬地主熟蒂香可揭鄙懷須一快聊效野人斲種瓜雖

賤工愛護渠敢忽孳芸治其煩灌溉滋其竭自然子母
繁翠蔓相連結種瓜誠有道養民豈無術噫余夙昔知
此意未及物

白水見梅憶士特

去年看梅時中郎共開樽今年看梅時獨招中郎魂悲
歡聚散誰作惱擬欲問春春不言

送謝中瑩

相別夢悠悠相逢懽草草送君躍馬臨長道十年顛顚

向塵埃一段精神推不老

與純臣原仲溫其煮魚羹

眾賓會高堂嘉魚脫重淵雙鰓尚呀呷綠藻仍牽連
厨人起揔袖刀机鳴鏗然斷尾頰殼碎批鱗玉花翩
雲雷翁深釜清泉已遙傳投蔥裂素絲裁薑落金錢
陶甌舉筠箸更覺真味全細紋松江鱸縮頸槎頭
鱖吾儕但知飽美惡無棄捐何論調羹手聊復試小
鮮

餘柑

炎方橄欖佳餘柑豈苗裔風姿雖小殊氣韻乃酷似驂
顏澁吻餘髣髴清甘至侯門收寸長粉骨成珍劑猶聞
雜蜜草少轉森嚴味竒才用不專雖用何殊棄端如效
苦言逆耳多嫌忌棄果事可傷違言德之累悅口易逢
知感茲發長喟

打魚歌

西溪觀魚仍開樽鳴榔隱隱沉烟村吾人豈有竭澤意
湏洞四際魚龍奔驚潛初見穿亂藻亟遁轉覺迷深源

向非驅迫羣黨聚罩麗徒使波濤渾巨鱗足供數客飽
銀刀瑣碎不足論吁嗟神物未變化暴骨砧杵寧非冤
江湖萬里厭游泳失地斗水能為恩臨流解網意亦厚
誘以芳餌仍爭吞因悲搖尾向數畧豈異俯首縻華軒
慨然投簪起太息歸思已逐冥鴻騫

潭溪十詠

悠然堂

吾廬猶未完作意創此堂悠然見南山高風邈相望賓

至聊共娛無賓自徜徉

海棠洲

煌煌海棠洲錦樹臨清灣常恨灣頭風吹花走潺湲潺湲去不息花亦無由還

醒心泉

藤蘿撥不開石竇一鏡明攜瓢酌清甘謬然瑩心神我病不能酌時來聽泠泠

懷新亭

茅簷入竹低曠野時寓目寂寂農家春新秧滿田綠何
時稻登場秋山響蓬樸

宴坐巖

青青梳樹林下陰蒼蘚石幽人宴坐時懷抱忘其適不
見暮樵歸寒山雨中碧

山館

春林遶舍青門館終日靜吾心樂有餘所寓皆勝境更
鑿庭下池溶溶浸山影

涼陰軒

北窓何所見疎竹雜遙岑涼颺思有無虛簷動蕭森此
興何由盡移床入翠陰

橘林

木奴困新移憔悴雪霜侵呼童剪其顛割愛慮已深會
待春氣回青枝補故林

蓮池

蓮池一畝餘瀟瀟吞衆流花繁不近堤欲往無方舟不

及池中魚隨波自沉浮

南溪

聊為溪上遊一步一回顧悠悠出山水浩浩無停注惟有舊溪聲萬古流不去

兼道攜古墨來望面龍紋墨背識云保大九年奉勅造長春殿供御龍印香煤旁又識云墨務官臣庭邽監官臣夷中臣子和臣卞等進蓋江南李氏物也感之為作此詩

長春殿古生荆薈猶有前朝遺物在錦囊珍重出玄主
雙虬刻作蜿蜒態枯皮剝製弄幾刻斷玦精堅磨不泐
吾聞李氏據江左文采風流高一代當時好玩不獨此
器用往往窮奢汰徵工選技填御府不惜千金為賞賚
治兵唐推英衛精治民漢許龔黃最惜哉取士不知術
妙手獨得庭却輩真主驅馳八極中荒王逸樂孤城內
汗青得失更誰論尤物競為人寶愛嗟余視此真龔土
事有至微猶足戒投文欲往弔江流幽魂未泯應慚悔

入開善


雙童肩竹輿兀兀如乘舟及茲朝暑微遠訪招提幽蒼
山望中橫清泉脚底流所歷已殊勝况乃窮林邱僧房
在在涼逢迎足茶甌岸幘幽鳥鳴橫琴素烟浮倦借一
榻眠吾生復何求薰風溪上來虛簷散颼颼開懷若傾
倒忽去不可畱人間苦炎熱物外常清秋功名非所期
聊尋赤松遊

寄茶與二劉

然松煮鼎山泉冽槍旗一水分優劣鳳餅推開雪照人
花瓷啜罷甘潮舌大劉談天紫髯張小劉逃禪清興長
會須酌此同翱翔或凌剛風九天上或泛弱水三山傍

劉兼道獵

劉侯好獵親馳逐指呼雙犬如奴僕朝衝唐石亂雲來
暮聽潭溪流水宿何如着鞭走大梁我亦與子同翱翔
今年獵叛醢彭越明年獵胡貊德光



屏山集卷十二

欽定四庫全書

集部

屏山集卷十三至
六

詳校官右中允_臣薩敏

主事_臣呂雲棟覆勘

覆校官博士_臣劉光第

校對官編修_臣沈清藻

謄錄監生_臣譚世緯

謄錄監生_臣蕭準

欽定四庫全書

屏山集卷十三

宋 劉子翬 撰

詩

觀二劉題壁

溫其題詩新歷寺落筆風雨驚長林眼高一世常欲罵
想見掀髯坐巖陰致中題詩新興寺壞壁歲久莓苔侵
山僧好事亦可喜解誦鳥啼春意深我來經覽渾如昨
王友金昆念離索投林倦翼不同棲況復分飛在寥廓

故山終勝他山好，新交不如舊交樂。何況把酒問鷗盟，
卧聽松風同一壑。

入白水訪劉致中昆仲

夜雨歇清曉，山椒雲氣昏。駕言聊出遊，窈窕窮川原。
側帽避橫篠，揚袂障晴暎。春泉散石壁，細草羅丘園。
陟峻已逾嶺，窺深更緣源。喬松傍澗折，垂柯激潺湲。
過籟寒慘慘，驚林白翻翻。造幽景寥閭，勝絕難具論。
僕夫知余樂，踟躕為停軒。惜無徒倚地，時來此開樽。
暮投鷺峯宿。

青燈耿柴門相從二三子交情久彌敦談玄測象象攬
佩紉蘭蓀願言固所懷丘壑吾道尊

攜筇

晨起偶無事攜筇出潭川翩翩雙鳬飛宛若導我前林
靜滴殘雨村深澹寒烟當春足膏澤俯夏餘清妍野溜
綠交貫山花紅接連雄觀發新奇勝地窮攀緣據石弄
驚急班荆蔭連卷幽懷脫塵拘如超混芒先向今作興
來未必勝偶然榮觀事多乖內取樂乃全他時誰繼遊

此意遙相傳

續賦家園七詠

早賦堂

南溪抱山流潤氣滋林麓平生歸與心寄老一堂足夢
破午窓陰清風在寒竹

橫秋閣

秋山萬尺青影落杯酒中登臨豈不佳寒色見遠空未
忘天下憂胡塵起西風

萬石亭

嵐光近却無一徑緣崖斷危亭勢欲飛翠石雲中亂小
山閱清遊懷人發長嘆

桂巖

山中多桂樹亭亭傍幽巖微風發秋香十里穿松杉誰
歌招隱詞吾生付長饒

百花臺

森沉徑易迷措筇為徘徊何處春光多時登百花臺主

人澹無情林花為誰開

酴醾洞

不愛酴醾花愛此酴醾樹青條含露滋輕陰覆行路晝
永倦尋書時來散幽步

意遠亭

雨餘陂水平徙倚聊一望歸雲淡欲無宇宙何清曠吾
心遊太虛聊寄此亭上

題靈鷲窟

翠合初疑無路往停鞭邂逅成清賞僧爐坐穩紙窓明
細雨忽來山竹響

和溫其對月之什

意根如亂苗已難仍復生讀君對月吟知君懷未平懷
悽有豐恨吟苦無和聲雄豪睨一世失路鴻毛輕所以
達觀士榮枯兩忘情蒼蒼古松林下有寒泉清醉倒石
上眠山禽喚人耕

讀平險銘寄李漢老

官侯鑿平劍浦灘遊子不歌行路難李公作銘垂不刊
峻峰激流生筆端斯文豈但夸雄觀寓理之奧開聾聵
惟人性天同廣胖橫目立見分庭壇紛然蔽翳榛葦荏
騰逃鬱屈猿蛇虺鉅剡獵利劍戟攢離睽截裂趙魏韓
千崖百瀨中繞蟠覆溺鬼岸麋堅完胡為氣舒貌顛預
旁觀已洞其肺肝浮思一縱坂走丸不極不止巧力殫
塗膏然其卒焦乾萬古乾坤元自安堂堂靈君司五官
乍臣乍叛勞控搏日漸月磨如印剗壯哉情枿牢盤還

躁謀欲驟加雕刻慘若蕭斧臨髀髓自腥夷之良可嘆
何如含垢休索瘢灑灑落落從中看豁然四通裂囊鞬
有如湍流平下湍靜看天空秋月寒療性此實言中丹
至味淡薄誰能飡我昔蒙公分賸殘桐花城西路漫漫
裁牋屢喚南飛翰何當澡淪紉椒蘭厚地為履天為冠
從公上征鞭龍鸞訪瞿追孔聊遊般物外虛明如許寬
脚底日轉紅團團瑤池造席一笑闌春著萬象流餘懽
茲遊未遂心博博吟餘北窓睡長斲清風時來撼琅玕

同胡原仲吳公路遊清湍亭賦詩得流字

出山曾幾時桂露颯已秋興來任兩屐散此默默憂嵐
光近仍滅鳥語靜忽流新亭迥臨危急澗循巖陬上有
獨樹蔭下有鳴湍幽長飈一振蕩俯仰聞颼颼早生塵
累心淨盡迥此遊徘徊嘯咏發瞻眺窮林邱天寒雲已
歸山好客自畱悠然百不知日月過則休人生樂在我
何必遂所求

和熊叔雅四詠

石峯春靄

寒山遠欲無春在冥濛處何如掃浮陰盡放岩堯露

清湖驟雨

快雨不相期平湖忽蕭颯坐久日明簷繁聲靜中滅

潭溪秋碧

秋空晚自明孤煙澹難起適意一枝筇時來對寒水

屏山夜雪

誰憐組練寒夜雪連營積有客卧衡茅淮山夢中白

次韻李漢老詩

蒙莊嘆隙駒，孔聖悲逝川。百年生有涯，萬感情無邊。賢
愚真唯阿，繫心同一緣。內熱蠱其中，伊誰肯求痊。樂哉
今日遊，衆賓肅初筵。社樗間羣材，嫫母參衆妍。謹弄旣
莞爾，獻酬亦頽然。胡為發爭端，咄咄論深禪。擊水但增
波，止薪自無煙。便應三宜休，敢論四不遷。公如高車馳，
揚塵絕通鄣。我如馭小駟，交綬已回旋。初謀不自量，取
困大敵前。金化質不亡，冰融水非堅。市門有真樓，相從

待他年

次韻致明七言

春風搖溪溪搖天劉郎詩思如湧泉已憐飛花大狼籍
却愛芳草長芊綿痴兒了事從渠了萬古寒空沒飛鳥
北海樽中興味長邯鄲枕裏功名小南山北山雲崔嵬
君胡不歌歸去來山中交遊苦相憶玉柱瑤瑟生浮埃

謝方德順古風

吾聞滄溟深浸灌東南維長風一蕩滴莽蒼天為低中

藏百怪珍文彩光陸離潛鯢盡鵬材浮魚悉龍姿罔象
遡波浮天吳躍空飛蚌雖辱泥塗猶能吐珠璣地靈物
固然在人必多奇英英方家郎秀發如瓊枝裝懷素王
書落筆幼婦詞我昔言壺山邂逅初見之賓筵為勸駕
一武登雲梯鴻騫九霄快驥騁天路夷似聞東諸侯辟
書已交馳惠然訪吾廬窈窕窮山谿夜燈一笑懽愁抱
忽若遺語妙時脫塵飲豪屢反聲平卮領新意自失佳處
昔未窺胡為遽改轅歸袂風披披上祈養德業下祝慎

鼎幃敬言崇道公久別良佇思

少稷遠訪敝廬仍畱佳句書此寫懷抱不足為
報也

常嫌門外車驅馳但揚塵今朝故人來喜聽聲鱗鱗昔
別自梁苑分飛湘吳閩痛心鳴鏑禍事往勿復陳共載
諧寥閭分筇上嶙峋山川舊賞識挾友意彌新徘徊小
精廬劇談口翻津為言漂蕩餘投跡荒寒濱夕火斧僧
林朝食糴隣困官閑非所恨有祿不濟貧牢愁寫萬斛

語壯眉不顰定知撐腸書為君發精神調鐘尚變啞畫
龍孰窺真吾聞倜儻才韜默貴自珍量海浚宜廣豪山
磨欲磷十科世所重羣公謂當仁向來薦牘飛壁光動
高旻陳編論糟粕中有王道諄謀國必張國療民須活
民但得君名揚何異我志伸

柳源觀瀑戲明仲

山橫曉色中綫路窮崎嶇何年貫日虹飄然墮秋虛晴
暉發燦爛陰飈助傾輸深深粉雪沸注險龍蛇趨平生

浩蕩胸對此聊一舒
蒼蒼古澄潭髮髯幽
靈居竒觀付豪逸
餘潤分膏腴來遊
今七賢賤跡欣與
俱扶筇却軒輊坐
石安甃甃壁陰生
小寒賞澹樂有餘
詩魔久已降幽事
復起予為言玉堂
人五字不可無

次韻明仲遊將軍巖

樂哉今日遊結友
盡英秀山靈欣客
來閣雨開雲岫步
屐出煙嵐聲呼荅
巖竇輕生快險竒
一墜那復捄崇林
翁地幽長湍瀉天
漏精廬記舊經密
徑迷新筵將軍隱

高寒古井餘荒甃

巖有將軍井

當年百戰疲蟣蝨生戎胃心

存巢許間功豈韓彭後慨然望中原毒手方交鬪曷不生
斯辰天驕過難宥妖氛六合昏長夜何時晝尊周感
獲麟懷楚歌啼狖世變莽難知如瞽窺篆籀置之勿重
論大白飲醇酎幽禽靜一聞寒芳晚三嗅方虛接勝懷
日轂轉何驟山南山北奇脚力倦尋究良遊易蹉跎澹
境難宿留詩囊歸倒懸瓊琚羨君富

寄彭子靜

東岫立高白曉寒生太虛閉門翻巾勝偶見良友書書
中有長句別懷陳鬱紆吐鳳詞旣絕續貂理難如起望
新卿雲一讀三卷舒繁思擾中局賴此豁欲無鵠鷄有
潛化蓬麻豈資扶吾人交義深不恨相見疎但恐德不
修心期愧非初

必源以古風見投詞意甚遠因為賦風吹原上
苗勉其植學待時也

風吹原上苗青青入無邊發生賴陽和秀潤滋澄漣遊

車走道旁忽之如浮烟那知丁黃愁朽腹望果然農功
日夜急地產東南偏飛霜皓盈疇豐穗垂連顛盤盂薦
新嘗瓊糜失輝鮮物生為世用豈較成後先羣芳紅打
圍從渠爭春妍

少稷賦十二相屬詩戲贈一篇

不用為鼠何數奇放牛南山聊自怡探穴取虎有奇禍
守株伺兔非全癡文成雕龍盈卷軸畫蛇失杯坐添足
走馬章臺憶舊遊歲月纔驚羊腴熟六窻要自息獼猴

黃鷄無應心日休白衣蒼狗變化易世事何殊牧豬戲
夜行潭溪上念原仲致中喬年茂元伯達皆有

入山期以詩趣之

長夏不見雨裨暑故相病及茲顛氣回一夕飛灑併攬

衣步新涼宇宙涵清潤月離

去聲

南山高水循雙澗靜流

觀外旣洽至樂中潛應緬懷平生友契濶時光運石峯
許尋盟有約殊未定事紛莽如塵欲掃那得盡年衰覺
世浮慮淡知心勝良遊莫蹉跎小暇即乘興

再和六四叔所賦十二相屬詩

飢鼠緣條殘果墮舍如蝸牛足高卧無心虎殿逐羣英
尚想兔園傾一座同年我又衰龍鍾變蛇相憐寧有窮
馬革戰場白骨羊裘釣瀨餘清風棘端造猴巧難學
且赴茅簷鷄黍約雲深杞狗夜可尋已辦豬靴走磽确
讀曾吉甫橫碧齋詩

攜鉏引荒泉偶步松崗北冷然毛骨清楚尾見秋色稻
氣馥初涼裡陰淡微日緬懷小齋居櫺檻增岑寂曠度

滅知聞微吟數峯碧若人端好修珍駕動無跡深窮伊
水源峻陟衡山極終焉憩孔林所樂惟自得延和數酌
醪侑靜一編易向來辱傾輸洞見胸中白思親道匪侔
既遠情不懌矧余質冥頑固未易刻畫尊生有遐心克
已無全力以茲畏所知負負常夕惕餘波倘時漸玉汝
天其戚

次韻明仲遊棲雲閣

溪山步步開圖障山影更隨溪蕩漾回環兩縣烟雨奇

一目盡奄長橋上乾楓枯柳淡不春歡伯為解愁城屯
書空咄咄亦良苦抵掌鳴鳴聊任真山房竹陰生晚寂
客醉忘歸主忘客沉機已寄謝安棋逸興何慚阮孚屐
道人棲雲樂其天孰知為仙孰為禪定應風蜩足枯槁
絕勝磨蟻爭回旋

同汪正夫行夫望鄱江

夜夢鄱江清曉踏鄱陽縣雲濤著眼新還疑夢中見寒
聲彭蠡合凍色廬峯見時方冬氣深水縮川原變連沙

突堆阜派港分組練蕭蕭蓬鬢風瑟瑟葭叢霰奇觀信
幽絕領畧殊未徧何當煙艇高載我行鏡面二難今勝
流愛客移清燕飲酣生泰和語妙融交戰衰遲百不堪
一快天與便回筇晚霽中路壓滄浪轉波光似畱人隨
裾蕩華綯

呂居仁惠建昌紙被

寒聲晚移林殘臘無幾日高人擁楮眠嚮卷意自適素
風含混沌春煦回呼吸餘溫偶見分來自芝蘭室乍舒

魄流輝忽捲潮無迹未能澡余心愧此一衾白嘗聞盱
江藤蒼崖走虬屈斬之霜露秋漚以滄浪色粉身從辟
紕蛻骨齊麗密乃知瑩然姿故自漸陶出治物猶貴精
治心豈宜逸平生感交遊耳剽非無得精神隨事分內
省殊未力寸陰捐已多老矣將何及自從得此衾夢覺
常惕惕清如夷齊隣粹若淵騫覲獨警言發鏗鉤邪思戢
毫忽勿謂絕知聞虛闡百靈集鼎鼐或存戒韋弦亦規
失則知君子所惠以勵蒙塞

任伯顯昨寄日柿不至續以膽瓶為貺

石瀨分攜常慘慘尺書沓至中彌感槁柿不呈嫗母面
圓壺俄落雄兒膽南窓吾伊俱不勤汲泉養花聊任真
枝頭造化豈耐久我輩自有無窮春

寄茶與汪正夫兼簡行夫

絳囊團窠社邊得持歸廣文破枯寂三人舌本有雌黃
一引胸次還虛白平生目成惟素書邇英能事知有餘
欸然長嘯風裂石黟山方卧小於菟

雲巖竹源二禪俱與招客三月二十一日遂飲
於竹源庵謀諸野則獲也劉奇仲有約不至
吳周寶游德華劉致中暨公望劉才仲陳聖
述某會焉從容辨論懷抱甚適因賦詩以紀
之

雲巖市聲中竹源山色處平生幾兩屐惟樂取意去晨
光霽老春飛蓋雙溪路沙平水漫流雲散天全露逶迤
經淺坂窈窕穿崇樹綠登方怒舒紅竟忽繁雨斯焉得

小休境熟來已屢徵君常主盟呼吸名勝聚子休心鐵
石太叔語韶獲鼎鼎吳劉陳俱有不凡度余衰氣不華
清遼慚輒與未渠推遠之政以朽然故九賓旣雲集一
士乃鴻翥毋多溷幽人蔬茗煩草具叢談雜莊謔泛閱
披黃素豐鐫辨活筆始畫窮真數解衣半日許萬古回
胸滕西窓引虛明汎灑延晚步嬾身厭依隨靜若超羈
馭博山真起予浮煙一枝驚

寄茶與曾吉甫

西焙春風一塍隔玉尺銀槽分細色解苞難辨邑中黔
淪蓋方知天下白岸中小啜橫碧齋真味從底傾輸來
曩歸畀余一語妙三歲暗室驚轟雷

竹源之集奇仲不赴蕭屯以詩嘲之再用原韻
平生老子興渾寄幽絕處寧嫌一坡遠甘作十歇去至
今清夢狂時走松陰路心忻自吟哦技癢輒披露那知
管蒯微辱報瑤瓊樹胸中萬斛清忽向毫端雨援桴未
敢再破敵已驚屢病身得所便一閱精神聚淇竹秋稜

樂洛花春布護真機不可藏文亦肖風度樂哉精廬遊
愧我不常與陋鄉豈無奇之此追陪故翻然卜隣心幾
逐長風翥但分茅半簷不假牛十具劉郎箇中人幽期
乃愆素曾無負負言直委茫茫數移文太遽生恐未明
深膝君有旋磨蟻瑣屑安故步何如驥突雲軒豁隨長
馭集枯豈小與動者中不驚

屏山集卷十三

欽定四庫全書

屏山集卷十四

宋 劉子翬 撰

詩

題大義泉

移筇山未深切骨寒無那蜿蜒瘦蒼虬脚底飛騰過幽
亭護石池庭事不敢浣虛中涵月淨冷面從雲呵

去聲欲

槌玄壁試恐觸方諸破平生泉石癡屢此箕踞坐重來
照清癯白髮漆箇箇凡心未痛浣老氣日以墮緬懷大

義風絕唱寧無和悚然聽琮琤耳觀為之大

同范智聞五月十四日夜賞月

微風淨郊原暮色含清夏層巔月欲上炯炯木葉罅豐
姿一髮虧爽氣千豪射流光不著地黃抹溪西舍翩然
釋矯飛雲浪鱗鱗化常恐螺髻青失此驪珠挂奇觀天
所吝老眼得屢借不嫌神太清跣立高梧下故人肯畱
連一笑偶良夜濁醪勿虛杯庭縞醉可藉

向元伯寄藝香陶爐有心清聞妙之語

鄱江細壤如凝脂陶成小爐圓淨姿色含三秋玉沆瀣
韻壓六尺金狻猊明窓澹澹浮薰起故人警余良有以
心清聞妙遊無方萬石只在吾家傍

元伯居
萬石鎮

感白髮

兒時坐澗石散髮如浮烟風驚綠鬢髻意欲凌飛仙那
知二毛見倏忽到老邊蒙紗猶鍤彩獵髯強呈鮮星星
倘未已遂恐華吾顛騎省歎遇合郎潛感述遭萬古寄
一轍長歌悲昔賢流光不假借志抱何由宣餘齡事可

知己矣寧非天窮通各有待憔悴孰使然淒其槁梧畔
惕若明鏡前靈膏豈能湮薶拂事可憐惟應幽室處一
猛放萬緣嘗聞衛生要心白髮自玄

同吳居安入開善四首

遊松庵

虛廊附山翔泉聲小庵閉齋餘恣行遨剝啄忻屢至午
陰遇蘭芳夕照坐松吹徜徉無所為聊盡今日意

宿省軒

夜空合一寂擾擾息萬勞幽懷耿不寐孤燈側殘膏稍
知山雨來聲在橫林高淒然却成夢夢泛秋江濤

過報德庵

循溪踏危磴路入簷簷塢森森翠櫺間一幹橫清雨茶
煙日月靜石壁軒扉古盡茲北山旁小勝無遺取

出山

日日冬氣昏霜風不鑱面回輿始見山數點寒中現我
行得勝友笑語生華絢如何劍峯南咫尺不常見

次韻茂元獨速歌

大兒行文學蘓黃暗潮無聲走茫茫小兒分題擬甫白
手扶藁頤取冰魄自成機杼誰如君悲歌乃有可憐色
曉來春歸薺葉新青女摧之良不仁那知妙齡氣如許
一睨辟易驚千人我亦歸為村裏翁接花成條歌屋紅
跣行肯追蹠躩步杯飲不羨琉璃鍾相逢他事不發語
醉面徹日承谿風君不見豐碑模糊立峴首又不見總
帷虛斟百眉侑何如吾儕見在身有口猶堪著醇酎陶

陶兀兀未全非赫赫炎炎豈長有硯峯絕頂撫孤松伊
誰及此蒼髯壽

張巨山賦蠟梅因成四首

取名慕橫枝要自同風格雖微調鼎味宛有金鉉色
渾疑蠟作花貌野中抱幽冷香不盈堦意盡仍一流
尖萼破微霜明犀透清暎不有朱紫繁那知中色尊
今日尋此梅危行石澗東花神欲宣令萬鐸懸春風
和李似之秉燭觀梅詩

凍色沉萬象晴巔露皚皚通宵月觀夢夢破東風來小
立值芳氣微尋見寒肝我病亦呼客沙邊久徘徊恍然
驚老眼一枝印清杯應知塵意盡故向癯儒開謫仙愛
逃禪茲心政難灰覘新不待晨燒燭寒巖隈草木有含
章發揮要天才賴公管領春筆端起潛雷

行夫寄黃山樵子有詩因同來韻

老坡文中哮闖聲凜凜常如對英峙琅然諷詠興凌雲
瞠若追攀顙流泚玉山妙唱久寂寥可與言詩有之子

裁牋遠餉風露新生我千尺黃山底初按玄穀出冰霜
小嚼清香泛窓几已輕魏帝昵蒲桃肯許唐賢魁綠李
極知人口無正味苦淡甘酸各矜美不輕真識為品題
此物初筵幾不齒青菁有用拔蒿萊白粲無酬腐糠粃
士懷瓌瑋勿自神邂逅飛沉同一理子才超矣會晤然
外澤中真期是以味果固已驅煩邪味道更須淪骨髓
劉道祖江程萬邱順甫講易孟子拾其意為二

十韻

吾初讀七篇未領躍如義晚而窺大易稍解寂然意乃
知平放著的在目前事盡心則無餘窮神忽超詣以斯
印羣書拈出句句是君臣父子間運量周旋際體之則
光明雜物了無累偉哉此陳編孔孟心所寄有如撞洪
鐘合響入迢遞言高聽者聵不絕僅如綴幸茲良友集
一發萬古秘真長富辭原百折無畱勢文通秉文均裁
度取中制宛邱坐忘言袖手豈深閑鄙懷頓為空快若
掃長簞旁觀二三子耳剽咸愕眙誘之循循然活處潑

潑地氣質雖有拘學問欲如蛻時乎不再來過此恐少
味大書鏡坐隅以起衰惰氣

韓幹畫馬闕四足龍眠榻而全之

吾聞兩臂天下重馬失四蹄將底用平生想似萬里逝
對此惟心惻然動得非曾落駑駘羣蹠脫泥塗良已勤
又疑逸氣厭拘係絕蹠徑欲超浮雲諦觀事乃不爾劇
破練丹青老無色軒昂自有尊足存顧盼一株陰山碧
韓生筆法妙此圖龍眠榻出了不殊斷鼉自昔徒聞說

續鳬雖工計已疎何如染作滄江遠要看追風蹴微雲

次明仲砭字韻詩

類宮德厚仍信砭北扉筆力談笑扛重圭疊壁凜羣視
不使東甌成陋邦日邊時見召仙李林下那容棲老龐
故園此日成勝聚歸夢不泛瀟湘江萬畦流泉裏雲屋
一點遠岫低吟窓客來有酒輒均醉長嘯手拊高梧幢
挽蔬唯便玉本脆碎鯉屢惜銀鋌雙伊余於世真長物
掃迹自分逃崆嶸驟掄揚之則過矣豈有骨相當奇厖

左提右挈倘聞道一了快若船下瀧極知魯衛兄弟國
邾小尚許趨風降堯堯岌岌正壁立濤瀨未敢輕春撞

寄致明兼簡余時升

簣簣有利材要自為本觀綠虬挾春怒穴土氣已完達
士審所施窮士審所安癯劉燭人鏡偽態了莫干常吹
噓二余傳以摩雲翰大余攜書來一見意已殫似為殊
勝搖胸中袞濤瀾皴膚褫厚襲朽腹拾衆殘那知藝圃
遊宇宙自爾寬黃間跳鏃易省括眼要端幸公調護之

無使困所難
鷺峯橫几上
晚翠深作寒
徜徉有真樂
未應悔儒冠

次韻明仲

祝融散仙在西溪
此老平生無町畦
一日不見十日恨
綠稻渺渺吞幽思
細紅時澆壘塊胸
跣行笑逆冷然風
意消萬事如燎髮
小醉扶頭須半月
叩梧林谷為呼號
隱几乾坤有超越
自憐頑鈍不可鞭
挽之欲置名流邊
長言為我溲裨暑
灑目萬綫琮琤懸

入白水懷士特溫其

曉山隨意開夏氣含露澄扶筇過巖嶮飛仙亦凌兢松
濤淨可漱嵐煙起如蒸巨嶧轉鼎鼎危膝上層層悠然
瞻眺地髣髴記昔曾是鄉雖窮深深泥秀色凝高扉靜
相對招邀足嘉朋讌席覆大斗吟窓暉華燈于今安在
哉骨冷喚不磨軒軒鸞鳳遊驚颺失飛騰豈伊黃壤恨
興言鯁煩膺含章不震輝憔悴非所應雖微三字顯要
許二豪稱余衰怠好修故態了不懲倏爾念離索終焉

愧瓌能噫嘻長風來躊躇素蟾升及時痛自策迅彩不可憑

胡明仲潭溪三日飲

潭溪梧竹堆無地浮高蔭暑中猶未佳袒膊俯清深急雨翳幽芳空山落啼鴛村醪得舊燒時果出寒沉醺然三日醉是鄉絕呵禁巖風故吹醒逾逸嫌太甚人生唯一真擾擾萬緣滲斯遊不屢尋老境恐遂寢窺樽有餘波捫腹猶可飲澹蟾如曉色渺渺長空浸當夏景過清

浮雲忽飛譖酣歌金石號慷慨君獨任俛余酬對之祇
作寒蟬噤吾唯善吟臺忘形卧相枕

有懷

溪石磊磊出溪光失溶溶呼童理新堰小駐萬折東素
杙競駢立蒼皮堆已重誰裁一道天忽墮顧眎中遠淥
送鳬鶩餘茲上杉松微波且勿搖照我澹有容炎曦為
變色爽氣排高空懷哉所親愛此適未遽同徜徉孰為
伴惟有溪頭風時來翻素書頗似驚我慵騷騷復策策

涉獵味正濃久而寂無聲無乃意自融却泛碧滄浪鱗
鱗散遺踪我亦隱几酣那能辨雌雄

早飲

柴椽百枝蔭方塘高梧老柳著兩行輕烟曳組適寒碧
笑蘂釀出秋風香宿醒縈胸殊未快衝之欲引天潢派
戲投小餌向深淵錦鱗忽見空中挂驚清鱸雪更作豪
坐客狼狽已半逃嗚嗚叢歌猶未徹兀睡聽作蜩蟬號

次致明泉石軒詩韻

天懷迥與塵囂背蓬萊屢踏金黿背閑披白袷過清湖
爽氣涵空渺無外澹然愛此一泓奇散髮逍遙漱華滋
尚嫌林影太凋薄斜陽射破碧琉璃遙知宣室虛前席
良裘固非一狐腋他時歸夢想南飛瓊詞已為磨崖石

借致明玉槎事藥復以小者易去因而銘之

潤色瑳癯身橢飛石塵供藥裹以小代大無不可汝雖
眇乎寔磊砢摩頂至踵轉衰我彼方歸卧畱莫果魁梧
之才用則左嘯然長嘆口侈哆

寄魏元履

世情事虛文十幅了一書片言倒肝膽子獨不佞余班
班眼中秀學膽誰似渠平生幾兩屨踏破牛斗墟小言
謁侯門大言叫天都歸來闢存室默坐追亡逋床頭著
韋編盤礴萬古初時拈紙上語破的妙有餘已甘酬對
難舌本噤不舒矧余在半流所見方模糊蝸涎不自潤
詎敢相濡濡人生強多知於已固已疎曉邊遺太極意
上町六虛獐猿繫尚跳况乃拊檻呼是神非吾神滓穢

政可奴嘗聞不遠復佩作三字符煌煌杏壇春一枝明
清湖蜂蝶未全知佳處自不孤惟子先著眼時來採芳
腴何當共叩微歸性有順塗

新涼

新涼為招客勝集非預圖前峯雨未散冷風遶吾廬披
襟沐清駛合席隨霑濡定知喧譁中欲此一快無興來
擴以酒草具來須臾田翁偶過我添杯坐其隅為言秋
暑劇稻畦日凋疎寧辭抱甕勞僅給園中蔬喜茲甘澍

足普潤無遺墟遙山莽難分綠浪搖虛徐我病不任耕
歲收仰微租蒙成每自愧一飽便有餘連觴使之醺醉
語雜叫呼野人無他腸我輩恐不如

吳傳朋遊絲帖歌

園清無瑕二三月時見遊絲轉空濶誰人寫此一段奇
著筆春風吹不脫紛紜糾結疑非書安得龍蛇如許癡
神蹤政喜縈不斷老眼只愁看若無定知苗裔出飛白
古人妙處君潛得勿輕漠漠一縷浮力道可量千鈞石

睦余弟兄情不忘軸之遠寄悠然堂謝公遺髯凜若活
衛后落鬢搖人光翻思長安夜飛蓋醉哦聲若南山外
亂離契濶三十秋筆意與人俱老大政成著脚明河津
外家風流今絕倫文章固有機杼用戲事豈足勞心神

傅朋王逢
原外甥也

次友石臺詩韻

清湖嵇玉山縹緲飛雙屐冷風隨處流三伏無赫赫未
成玄圃遊聊醉端川宅憶昨陪初筵杯搖劍峯春杉篁

漏疎櫺雲氣縈長帘主人意彌厚不吝園蔬摘我亦洞
幽懷洄此一泓碧至歡召融融叢慮消刺刺聽君誦九
流浩若崑崙擘摩天俊鳶飛響澗驚魚擲分攜今幾時
浮埃翳瑤席有如爛柯翁萬古逢一奕醉鄉梯磴坐坐
覺乾坤窄茲行不果從兀兀恨滋劇未應柳源近終作
桃源隔畱詩友石臺光動嶙峋石正令謫仙來著語無
以易強吟意悠哉追風了無迹

胡明仲羅養蒙為悠然集追用前四疊之韻

筠州喜陪笑語新鑿坡自來清湖濱更招明月作三客
此外正復難其人瑤觴十飛才小醉追逐牢愁出肝肺
吾儕邂逅非作豪常恐真歡來不繼更闌已番四疊歌
却喚輕舟浮綺羅一聲橫笛不知處荷氣萋萋風頭多
玉山未倒誰之恥霜露霑衣聊且已維舟落月界平潭
翠亂紅披扶不起

十七日集清湖

石堤蟠素虬捍此百尺灣臨灣喚客飲四座搖潺湲殘

歌紅蕩析凜若超塵寰却愁涼吹多奪我酣醉顏時方
雨聲斷草木淒餘潛潤氣騰晚水浮嵐撲秋山領畧得
妙趣心遊勝躋攀那知百年憂共樂此日閑篝燈夜分
歸危膝轉彎環芊芊稻苗風綠亂不可刪不礙一月流
水丸走其間慙慙傍扶輿宛若送我還

曉起聞明仲謁家叔嘗過門追已無及繼續觀
霧長句因次原韻

公才凜若干將鑄膽落詩流失輕倨弄毫邂逅即揮奇

造化玄機悉披露凌晨訪客忽飛筇雙澗徐穿碧交互
笑聲只在竹林東夢破急追無復處是時秋霧正含空
潤氣一解驕陽怒霏霏半掩景賢峯翳翳全沒邨中樹
初疑爭先摩玉壘驚塵漠漠桑乾渡又如懷渴望梅林
細雨濛濛江左路煩公一吐胸中豪與此氤氲角馳騫
可憐南山玄豹姿終以斑斑作身悞何如霧隱長暗然
豈用毛采夸天嫫霑濡稻壟更潛珠聯絡松崗尚橫素
南箕忽哆遂雄吞顧眎恍若南柯寤向來昧昧六合間

日月山河但如故世緣所遇孰非虛不具真眼那能覷
醯雞蠅裏有全癡陷虎機中惟一悟我雖不獲從斯遊
兀坐深觀亦同趣况知陶令有名酒未覺許詢無勝具
便思追逐胡公墩恐激長言又生怖願低筆力許我陪
韓孟才懸亦聯句

觀胡文定公手墨因求別本

溫溫文定公至道夙所欽神超雖緬邈餘英壯儒林正
容閱真翰默默流至音不事八法奇天成寫幽襟有如

瀚海鴻隨波自浮沉又如太虛雲舒卷杳莫尋乃知晉
魏還筆端有哇淫棄橐競韞藏非將玩球琳庶幾字畫
間可以求其心清伊一派流滙作萬丈深溝渠有暴盈
渙忍時見侵投膠了不難公以獨力任我慚步趨晚悠
然寄孤吟流風在目前著鞭要駸駸願分墨本餘刻之
蒼崖陰大塊有動搖斯文無古今

公帖云世間一切如
流水浮雲所過者化

不足畱
胸中

寒中偶書

寒從何處來凜色照閨楚挹之霜松下清澹不成雨豪
生小病之一笑窺寰宇天轉隱江湖吾心正如許

病中追賦遊武夷

建水日夜淺清灘自迢迢漁舫愕已無忽點淨練遙老
身寄其上兀若棲危茗松風知我狂隨舷助傾搖探幽
神益新得快意自消長林翠洞口微雲粉山腰那知碧
虛遠一葦卧可超不須換吾骸吾慵登岑堯病中追餘
觀所得絕富饒

病中賞梅贈元晦老友

梅邊無與談，賴有之子至。荒寒一點香，足以酬天地。天地亦無心，受之自人意。韜白任新和，風味要如此。

次韻致明聽琴

病中作

病翁不咄咄，琅然寄枯琴。倘無枯琴寄，孰表吾之心。忘形豈知病，道在寧復今。龍蟠老樟下，聲發搖長音。

過鄴中

逐鹿營營一夢驚，事隨流水去無聲。黃沙日傍荒臺落，

綠樹人穿廢苑行
遺恨分香憐晚節
勝遊飛蓋想高情
我來不暇論興廢
一點西山入眼明

屏山集卷十四

欽定四庫全書

屏山集卷十五

宋 劉子翬 撰

詩

金陵懷古

荒城莽莽蔽荆榛
虎踞龍蟠迹已陳
赤壁戰爭江照晚
青樓歌舞鳥鳴春
十年王氣雄圖盡
一疊寒笳客恨新
折屐風流猶可想
只今高卧豈無人

會兵

羽檄西來趣會兵
秋風胡虜更縱橫
烽明石嶺塞垣迥
馬渡分河波浪生
使者漫傳蘇武節
君王頻幸亞夫營
百年信誓明如日
何事紛紛起戰爭

別安子允

得酒猶堪慰倦遊
長亭直為故人留
煙塵幾處兵猶鬪
風雨一年春又休
尚記虎頭初擲筆
終憐猿臂未封侯
離歌唱落榆關月
可是君心耐得愁

望楚

客浦舟凝滯凭高識楚鄉有愁闕眺覽何地不淒涼草
木詞人怨江山霸主亡悠然獨搔首暮靄一星光

井泉

石井水濺濺寒砂映碧鮮雨聲添溜急天影入波圓曉
汲連山寺春耕潤野田杖藜三嚙罷毛髮更蕭然

巖桂

涼颼振遠村寂寞度清芬山路不知處月窓時夜聞孤
根寒抱石落子半飄雲袖手空延佇無才可賦君

園蔬十詠

茭白

秋風吹折碧削玉如芳根應傍鵞池發中懷灑墨痕

芋

分得蹲鴟種連根占地腴曉吹黏玉糝深碗啖糗糊

韭

肉食嘲三九終憐氣韻清一畦春雨足翠髮翦還生

新

溉釜熟輪囷香清味仍美一線解瓊瑤中有佳人齒

芥

葉實抱芳辛氣烈消煩滯登俎效微勞乍食驚頻噉

菰

周郎愛晚菰對客蒙稱賞今晨喜薦新小嚼冰霜響

波菱

金鑊因形製臨畦發水嘆時危思擷佩楚客莫紉蘭

子薑

新芽肌理膩映日淨如空恰似勻粧指柔尖帶淺紅

蘿蔔

密壤深根蒂風霜已飽經如何純白質近蒂染微青

苦益

雖無適口味暖益功稀比菜苦不登盤言忠多逆耳

次韻盧贊元喜雪

六花初逐曉風繁五袴那憂歲晚寒杖屨客迷村徑遠
笙歌人在小樓看也知近郭梅先動只恐行春路未乾

授簡梁園休惜醉銀臺列燭妓圍寬

府會次士特韻

夜宴芙蓉苑華檠燭影光使君頻會客侍女慣新妝
劇飲不勝醉論詩非所長倚欄霄漢近宮殿鬱相望

士特贈別次韻

客舍愁分袂梅花小雪前夜看牛渚月春別剡溪船
麗句先行色悲歌慘別筵後期相約處雙闕五雲天

訪士特舉和六四叔詩因次韻

聞道歸舟泊淺沙
藍輿出郭日初斜
新傳賦詠來梁苑
舊識芝蘭向謝家
遣興只憑樽有酒
感時愁見樹飛花
相逢未款還相別
回首長亭髮欲華

分韻賦古松得青字

風韻颼颼遠更清
蒼髯瘦甲聳亭亭
連根欲鬪巖壑力
一蓋常涵雨露青
曾映月明留鶴宿
近經雷霹帶龍腥
衰殘愧我無仙骨
願採流膏慰暮齡

六言二首

鼎食鼎烹謀拙山南山北興長片夢彭殤壽夭一枰楚
漢興亡

黃卷篋中昆友白醪杯裡聖賢我願長閑足矣人憐獨
處蕭然

池蓮四詠分韻

葉

郁烈香浮雨團團綠蔭波近堤千葉亂知有畫船過

花

孤紅低映岸併艷遠連汀露浥層層展風披葉葉零

藕

密蘊羅文細明含玉色清水盤時薦美刀菴斷絲輕

子

分房圓戢戢弄色翠娟娟摘實憐空葯方知雨露偏

雨歇

雨歇長虹淡欲收踈踈寒靄暮依樓西風滿院催搖落

已覺梧桐不耐秋

新灣

萋萋寒生水面煙吳歌唱罷月微偏
停橈又向灣前宿
一夜西風浪打船

汴堤

參差歌吹動離舟宮女張帆信浪流
轉盡柳堤三百曲
夜橋燈火看揚州

天迥

天迥孤帆隱約歸茫茫殘照欲沉西
寒鴉散亂知多少

飛向江頭一樹棲

葉集之舉士特唱和因次韻

漂泊分攜後
難難會面時
夜燈初獻酒
春草舊題詩
遊宦君雖厭
才名衆所期
不應如倦翼
寂寞戀南枝

銅爵

金碧銷磨瓦面星
亂山依舊遠宮城
路人休唱高臺曲
臺上而今春草生

中渡

渡南渡北是長亭沙上行人立馬情回首若無煙樹隔
只應猶望見高城

江上

江上潮來浪薄天隔江寒樹晚生烟北風三日無人渡
寂寞沙頭一簇船

送曾彥思減罷赴闕

馬首成南渡西風木葉疎去程烟雨外孤館別離初未
試平戎策空懷逐客書漢皇方問賦誰復薦相如

過楚懷王廟

割據銷殘運并吞
息戰塵遺民猶憫楚
三戶欲亡秦念
昔懷王立潛圖霸業
新降顏欣接士薄伐
屢窺隣慷慨
心何壯
難勢未伸
干戈憐暴骨
玉帛更和親
末路人
多詐輕謀禍及身
單車行凜慄
伏甲變逡巡
鹿走章臺
下龍沉渭水
濱素棺歸慘淡
故老恨酸辛
歲月今何在
興亡跡已陳
愁陰生古廟
翠蔓鎖重闌
有客投清酌
臨江憶放臣
聽讒雖主惑
多難亦時心
憤氣摩星斗
哀詞

動鬼神飄零瓊玉佩寂寞蕙蘭春毀譽千年定窮通一
死均招魂嗟已矣抱石想漂淪戀戀空回首行行欲問
津潸然憂國泪今古獨醒人

雙廟

無復連雲戰鼓悲英風凜凜在雙祠氣吞驕虜方張日
恨滿孤城欲破時幽鳥自啼簷際樹夕陽空照路傍碑
平生不作脂韋意倚棹哀吟兩鬢絲

一樹

一樹梅開早清香襲客衣夕陽簫鼓散半是折殘枝

偶步

偶步忘歸遠心閒逸興增山深知有寺路盡不逢僧

離居

馬嘶何隴暮有意念離居去路經秋雨行裝一擔書窮
知身計拙病覺世緣疎曉枕殘歸夢翻然憶舊廬

有感

抱石親征澤潞時艱難猶想舊開基官軍不守河陽渡

回首橋山淚欲垂

程嬰墓

停車莽蒼認孤墳
烈烈英標尚想存
已脫遺孤安趙氏
更輕一死報公孫
荒林雀噪風常急
古道人稀日自昏
惆悵九原如可作
欲憑楚些為招魂

晚宿

石瀨分流小霜林間樹紅
暮橋橫隱約寒鋹響丁東

畫船

隱約菱歌斷斜陽水面移美人貪照影不覺盡船歌

宮亭湖

近湖黯黯氣常寒指點宮亭渺莽間素色夜浮金楚月
綠光春浸十洲山醉思天末騎鯨去老怯風頭聽鴈還
柔櫓聲中知禹烈愧無椽筆畫孱顏

安仁道中

汨汨復汨汨著鞭鷄一號老身緣底急長路只徒勞石
亂春溪惡山深曉月高村沽得微醉猶足張餘豪

酴醾

顛風急雨退花晨
翠葉銀苞照眼新
高架攀緣雖得地
長條盤屈總由人
橫釵素朶開猶小
撲酒餘香韻絕倫
唯有金沙顏色好
年年相伴殿殘春

夜坐

客裡驚秋晚
慵眠但曲肱
夜闌深院雨
人過隔牆燈
遠思千端惡
寒威一倍增
夢孤渾易破
哀柝故登登

靖康改元四十韻

肉食開邊釁天驕負漢恩陰謀招叛將喋血犯中原飲
馬江河竭鳴笳宇宙喧氛埃纏帝座猱猱吠宮垣鼓銳
梯飛壁彎強矢及門黔黎驚瓦解冠蓋盡星奔走轍秦
城地浮航楚峽村畫堂空鎖鑰樂府散嬋媛夜詔聞傳
璽春王記改元三辰光盡匿四海浪橫翻伏閣惟羣彥
興邦在一言雉城期必守虎旅更增屯龍困雖憂蟻牛
羸尚覆豚謀成擒頡利義可絕烏孫堅壁師彌老窮兵
火自燔鈎魚猶假息幕燕暫游魂懇款情先露誅鉏黨

實繁橫磨非嗜殺下策且和番割地煩專使要盟脇至
尊賜弓垂拱殿畱宴玉津園回騎桑乾北游軍廣武源
驅馳無立草剖斲露空墳太子悲秦粟明妃泣漢軒敵
情終未測隣好久宜敦晉趙封疆遠金湯阻固存短衣
求李廣長嘯得劉琨御極朝儀盛臚傳詔語溫神霄分
別仗法駕引雙轅內柳東風軟宮花麗日暄閭閻多喜
氣簫鼓送芳樽運契天同力時危禍有根覆車宜自戒
曲突更深論落拓江南士飄零塞北藩蚤嘗專翰墨晚

厭屬橐韃拔劍還摩壘懷書擬叩關蹉跎謀不遂感激
氣潛吞野迥寒烽照樓高暮雨昏望鄉心恍惘憂國涕
潺湲仄席勤諮訪垂紳樂引援鵷鸞方競集短翼待騰
騫

春雨

暝色春朝雨滋榮喜及時雲昏遙莫辨地渴久方知柳
岸遊車歇濤江釣舸移拒寒須把酒病骨況支離

瀑布

路窮巖瀑挂夾氣淨塵紛溜險時依壁源高半隔雲入
池驚練盡觸石聽雷分接勝多幽侶筇聲破蘚紋

海棠花

幽姿淑態弄春晴梅借風流柳借輕初種直教圍野水
半開長是近清明幾經夜雨香猶在染盡胭脂畫不成
詩老無心為題拂至今惆悵似含情

策杖

策杖農家去蕭條絕四隣空田依壠峻斷藁布巢勻地

薄惟供稅年豐尚苦貧平生飽官粟愧爾力耕人

送杜季習四首

結廬空谷抱沉憂底事軒車肯為留千里問塗良獨苦
似君須向古人求

聞道華亭已解圍親朋消息未全知君歸為遣書來報
細說從初喪亂時

寂寂家園草覆堦亂兵飛箭入樓臺丁寧莫斫湖邊柳
盡是劉郎手自栽

搖落難堪更語離
曉風吹月上征衣
送君直到長亭去
隻影愁尋舊路歸

劉處士墳山禮亭

風馬雲車悵莫尋
祠亭空鎖古原陰
豆觴三獻禮經事
霜露四時人子心
世盡浮雲同渺渺
名高拱木共森森
平生積善身徒老
賴有家兒敵萬金

喜誅大將

自提烏合衆南北
久跳梁避事幾危
國專權擬僭王然

臍誅未快擢髮罪難詳膏血汙砧斧何曾灑戰場

疊嶂

益遣歸心快愁霖喜乍晴樹陰迎馬合波影照人清不
見雲山路時聞樵斧聲暮雲偏有意相伴隔溪行

梅花

玉骨綃裳韻太孤天教飛雪伴清癯林寒疎蘂半開落
野迥暗香疑有無庾嶺風光仍似舊漢宮鉛粉莫相汙
驚心不必臨空樹一白流空春便徂

和李巽伯

浦樹冥茫裏雲山淺淡中
客愁生遠望春意入晴空
酒憶相如病途憐阮籍窮
慙慙桃葉句欲和愧難工

野步

野步忘歸遠春心不自休
管絃非老伴風雨定花雛
柳暗深深路溪寒小小樓
謝娘歌白紵此意可忘憂

李伯時畫千古圖鄭尚明作詩詩詞多振絕因
為同賦

王猛捫蝨

劇談世事灞河濱
奇骨瓌姿兩絕倫
却訝秦無豪傑至
坐中捫蝨定何人

高陽長揖

胡牀二女執巾裾
長揖高陽舊酒徒
不是蒼皇能輟洗
溺冠何異昔坑儒

霍光取璽

此郎守節固堪論
漢璽飄飄亦僅存
周勃取將迎代邸

霍光持去授皇孫

馮媛當熊

婕妤下輦辭榮日馮媛當熊效死時帶礪稱忠惟一傳
宮闈著節有雙姬

李密迓太宗

海內羣雄逐鹿時虬髯一見識英姿牖窺已嘆尚書婦
野拜仍驚柱國兒

明妃出塞

羞貌丹青闕麗顏為君一笑靜天山西京自有麒麟閣
畫向功臣衛霍間

張釋之諫文帝

擾擾推理徧九原因山獨有霸陵存孝文儉德雖天縱
亦賴忠臣效一言

醉山簡

倒載山公豈酒狂羣兒拍手峴山旁汗青等是虛填耳
不把雲臺喚酒鄉

武帝問日碑

漢朝人物盡英奇武帝招延盛一時拒諫不能容汲直
託孤何至問胡兒

明皇覽鏡妃子翦髮

不復青銅照瘁顏
耄荒從諫若移山
只將女子論賢否
陶母當時亦翦髮

送原仲之荆南

風急塵埃滿漢關
送君行處路漫漫
不知爭戰幾時定

常恐別離相見難
三徑舊遊松竹老
五湖新隱水雲寬
交朋日覺知音少
綠綺從今莫浪彈

和士特南浦詩

羽檄分兵控上流
時傳烽火過隣州
樓船半渡旌旗曉
胡馬欲來江漢秋
淝水投鞭真浪語
幄中借箸有奇謀
吾儒雅有康時意
不把詩輕萬戶侯

屏山集卷十五

欽定四庫全書

屏山集卷十六

宋 劉子翬 撰

詩

景陽鐘二首

景陽鐘動曉寒清
度柳穿花隱隱聲
三十六宮梳洗罷
却吹殘燭待天明

一刀殘月淡觚稜
遙映林梢曉色升
寂寞小簾風露冷
玉盆脂水已生冰

春夜二首

葉葉風鳴幕稍稍雨打窓煙銷寒寶鴨膏淺側銀缸
樓迥星河轉宵殘鼓角催重門和月鎖寒夢遶花回

賦雙溪閣用蔡君謨詩聲字韻

雄觀今古快幽情突兀層樓出市甍二水交流何處盡
孤舟不見亂山橫丹爐寂寞仙遊遠劍氣蕭條客恨盈
向晚移樽話流落不堪時聽鼓鼙聲

泊舟

莽莽荒茨岸回回亂石灘雨寒收市早風急泊舟難寓
縣兵猶鬪乾坤網正寬慙慙囑龍劍莫久卧波瀾

劍潭贈李似表

夜窓把酒對鵞峰分手悠悠各轉蓬艤棹相逢煙浪際
有家皆在亂離中胡兒久占清河地壯士誰收赤壁功
他日著鞭先後耳飄零不用嘆途窮

舟中寄似表

溪流元自急積雨更兼旬曲渚方移棹高城忽背人艱

難爭避地去住不由身客食憐詩李相期一問津

次韻張守同往華嚴

淺水荷花開傍橋晚鐘樓殿碧山椒林松遶路行不徹
野鳥避人飛更遙喜有高情共邱壑應須長嘯混漁樵
老僧好事能延客未覺山房苦寂寥

出郭詩呈張守

出郭籃輿載酒隨林邊蕭寺趣幽期雲依石度遙看久
路遶田分欲去疑落日悲風滄海外黃花翠竹晚秋時

憑詩一寫登臨勝為報壺山太守知

次韻張守壺山詩

松根繫馬望巔岵乘興攀躋不作難日出漸看林霧散
潮來先覺海風寒遙連釣石多紅樹半出僧垣盡綠竿
不見雙旌來視稼憶君對酒豈能歡

次韻方學士萬卷樓

淵然推量德為循酷愛收書定可人劉向討論稱好古
退之學問美藏身箕裘有子能傳業俎豆於今嘆不辰

我亦平生譏傳癖可憐朱墨費精神

次韻吳教授題子應山齋

芒鞋竹杖日隨身所向逍遙樂任真
強健掛冠非矯俗榮華得路轉迷人
愛山兀兀常心醉與世悠悠只貌親
最晚論交欣得子一樽猶足慰漂淪

張守唱和紅字韻詩八首

午枕回清夢疎林逗遠風
茶甌烹葉白果釘剥方紅小
壘常稀訟隣邦近息戎民謠
知善政欣助亦何功

一卮那惜醉引劍坐生風怒髮冠衝綠憂顏鏡損紅莫
輕秦黷武舊恥漢和戎慷慨今賢守燕然擬勒功

漂流今海角胡騎忽秋風舊隱懷空翠征途厭軟紅時
平猶倦仕力小況從戎欲遣愁城破須論酒子功

燦爛燕公筆飄然邁祖風高吟時舉白戲語或題紅訝
敏文翻水誇嚴律比戎詩壇如第將蘇李謝前功

海市從蕭索杯盤樂土風郡樓山向背村塢樹青紅玉
塵唾夷甫牙籌陋阿戎王侯真夢耳穴蟻更論功

微吟時擁鼻瀟洒晉人風客至添樽綠官閑省印紅
易徂嗟歲月迭盛嘆華戎願草浯溪頌中興旦暮功

斷虹明晚井煙靄半隨風岸柳霜收綠庭榴日貸紅
酒酣腸有海棋戰手興戎賡唱逢勍敵方知比興功

濟難資長策常懷國士風秦強因將白魯弱更蒐紅
嘆已懷孤憤憂時咏小戎儒冠須勿溺邂逅亦成功

次韻張守述懷

避地漂流更海隅一身難料豈知餘晚樓獨上非吾里

幾日西來絕羽書
敵未息兵由運數
力難康世味孤虛
郡侯豈弟憂民切
魯史無因諷失魚

同張守謁蔡子強觀硯論琴偶書

共造中郎室
明窓玩好竒
硯珍鐫子石
琴古斷孫枝
篆鼎飄香遠
茶甌轉味遲
自慚塵土累
清話得移時

次韻林吉甫遊天台

聞說星郎隱翠峰
鷓鴣回首大明宮
倦遊壯歲拋朝紱
歸夢清江憶釣筒
賢聖相期黃卷裏
是非都付濁醪中

更聞蓮社多幽侶我欲時來問苦空

莫田

打麥蓬蓬響莫田兒童拾穗笑爭先
市頭米價新來減一醉瓷甌五六錢

石磨

盤石輪囷隱澗幽煙籠月照幾經秋
可憐琢作團團磨終日隨人轉不休

寒澗

林間幽鳥啄枯槎落盡寒潮一澗沙
獨木橋西遊子宿酒旗斜日兩三家

秋望

輝輝江日已沉西隱約餘紅泛渺瀰
却上松岡望秋色偶逢僧話立多時

兩山

渡南渡北兩山遙隔岸行人手可招
日暮海門煙雨黑一川舟楫趁歸潮

游儵

禹鑿天門浪渺茫游儵也解化龍翔風雲得路誇頭角
歲早爭尋窟穴藏

和徐從道韻二首

高軒遙肯顧掃室慣逢迎酒喜頻中聖官慙四至卿憂
時論曲突感物咏長檠古道難開口微君孰與明
拂袖歸來日柴門稚子迎貧甘守藜藿名不愧公卿寶
劍空藏匣良弼惜解檠中興誰草詔君盍在承明

蔡子強挽章

擢秀詞林少也奇
星軺榮耀更分麾
世傳清德名方盛
生不長年理可疑
蘇晉逃禪心淡泊
孔融好客酒淋漓
眼看玉樹埋塵土
零落交遊我獨悲

聞笛

倚樓何處笛飛響
徹雲霄曲怨吹難盡
風回聽忽遙戎
兵臨絕漢閨
婦起寒宵
一弄梅飛雪
華年髮亦凋

投壺

暇日賓朋集投壺雅戲同旁觀驚妙手一矢廢前功禮
盛周垂憲詞夸晉起戎區區論勝負轉眼事還空

思賢堂懷薛令

創始人何在空堂草棘侵衡門狐竄急穴柱蠹藏深羽
化王喬烏塵昏子賤琴獨嗟民困甚誰繼昔賢心

燒

惹草熒熒焰隨風烈烈聲欲臨橫澗斷忽上晚風明蹊
蹕無潛迹蒙茸有怒生尚餘飛燼煖培耔及春耕

潮

江晚潮風應蕭蕭
百里秋寒聲初戰
峽怒力暗移洲捲
岸舟船盡涵空
日月浮吳兒輕逐利
亡命雪山頭

洛陽橋

跨海飛梁疊石成
曉風十里度瑤瓊
雄如建業虎城峙
勢若常山蛇陣橫
脚底波濤時洶湧
望中煙嶼晚分明
往來利涉歌遺愛
誰復題橋繼長卿

途中

小市猶依海橫橋欲跨汀雨餘榕徑冷春晚芋田青薄
官低豪氣浮生惜壯齡急流歸亦好憂患飽曾經

次張守韻四首

久分閩地竹屢賜漢庭金才刃研先發恩波海并深寇
銷乘間禍民有不欺心祇恐鋒車起雲霄路莫尋

促席山堂夜寒燈吐碎金酒分鄰甕美粟爆地爐深疎
懶難堪事紛華易壞心自憐貪寸祿雙鬢老侵尋

瓦白霜封縞波清月漾金柝沈秋壘靜人語夜堂深故

國歸何日寒衾事滿心庭松憐手植擢榦已彌尋
泣懷三獻玉廉拒四知金勢利焚和猛詩書汲古深貴
無長得意閑有自由心响嘯丹砂在盟寒儻可尋

同李漢老登高齋

飛梯百級轉層巒政喜登臨着眼寬海上波濤連閬苑
日邊塵土暗長安亂來世事終無定春盡羈愁豈一端
賴有謫仙能喜客時陪杖屨得雄觀

過舟峯庵

杖策到舟峯開軒對綠叢禪心清似水客鬢亂如蓬鼓
角譙門日鶯花上巳風逢人相借問何地隱龐翁

悼李奉

選拔由親衛時危遠出征氣驍嘗忽敵身歿始知名故
妾辭空帳殘兵隸別營傷心豺虎窟冒險爾何輕

聞韓侯至

今代淮陰將宣威瘴海東夜營兵氣黑寒磧戰聲雄有
寇常親討無官可賞功屹然沈鷺貌識汝未侯中

次韻張守梅詩

破雪梅初動南枝更北枝
傍牆應折盡背日較開遲
曉角驚殘夢春愁占兩眉
狂風將落藥故入畫樓吹

次韻陳成季郡會

疾雨狂風恨若何
芳晨坐覺等閑過
惜花意欲春長在
對酒年來飲不多
雅會欣聞珠履集
新詞好付雪兒歌
風流閣老推前輩
喜客溫顏似醉酡

古松

手植知何代
樅樅萬蓋齊
韻清琴易寫
榦直鳥難棲
慘淡連雲塢
鬢髻蔭石谿
剝明雖小用
曾照路人迷

出郊

路轉囊山北
扶輿憶舊過
乾坤征戰久
遊宦別離多
瘴樹餘紅葉
春江又綠波
平生豪橫氣
未老半消磨

偶書

風急胡塵暗九州
岸巾長嘯一登樓
故園却憶桐孫在
薄宦端為荔子留
湖海以南兵尚鬪
干戈不息禍難休

似聞推轂皆飛將
盍有清談謝傳流

送惠州使君范智聞

喜聽清談滿座傾
不堪行色動雙旌
長亭把酒分攜易
暮角催人太瘦生
地遠守臣知妙選
時危壯士恥南征
羅浮說與潮陽近
盍擬離騷弔二英

柳

體為常輕定復飄
間梅遮杏得春饒
別離處處添愁色
風雨年年換舊條
拂瓦半枯陶令宅
沿溪不斷霸陵橋

淒涼又見千門綠野老當時恨未消

鹿鳴燕詩送諸進士

講藝欣聞暫息兵
槐花秋晚詔羣英
胡塵不隔蟾宮路
鏡水初題鴈塔名
禮盛邦侯開宴豆
道隆鄉老萃簪纓
更期妙手皆穿的
薦士吳僚亦與榮

至日

客中雙鬢老塵埃
海角仍逢至日來
近臘風光初染荔
新陽氣力僅浮灰
豆糜厭勝憐荆俗
雲物書祥憶魯臺

搔首故園心欲斷
少陵賴有掌中杯

曲倚

器成因揉木偃月勢相侔適用形雖巧論材性本柔倦
凭觀秘籙趺坐接禪流莫效愚溪戮時多曲似鉤

宵長

宵長慵早寐念念客愁新燈影明高屋蛩聲動四隣滿
懷平日事雙鬢倦遊身避地從漂轉西風羽檄頻

試弓

結束擬從戎秋堂試寶弓角寒開拒手弦勁響流空巧
易穿楊技神誇飲羽功挽強吾有待狐兔莫爭雄

次韻張守梅詩

草棘蕭蕭野岸隈暗香消息已傳梅雪欺籬落遙難認
暖入枝條併欲開愁向天涯今度見老隨春色望中來
似聞詩社多何遜盍試招邀共一杯

次韻張守立春

把酒酬佳節遨頭樂未央池冰猶澁舫岸柳已籠牆曉

院簾幃卷春盤餅餌香慙慙分彩勝為掩髻邊霜

九日登北山

戲馬英雄安在哉閒因九日上崔嵬步窮巖壑身志倦
望盡乾坤意始開已向晚風催落帽可無新菊共浮杯
佳時急早須行樂老境侵人咄咄來

荔子

挺秀窮荒嘆未遭昔人吟賞著風騷縱班盧摘材非偶
不近長安價愈高烟雨萬株遙若畫塵埃一騎笑徒勞

瑤盤此日無遺選
品格妍媸敢自逃

龍眼

幽株旁挺綠婆娑
咏嘔雖微奈美何
香剖蜜脾知韻勝
價輕魚目為生多
左思賦咏名初出
玉局揄揚論豈頗
地極海南秋更暑
登盤猶足洗沈疴

次韻張守酴醾二首

榮華休羨黑頭公
且對芳辰賞麗叢
十萬青條寒掛雨
三千粉面笑臨風
莫將擬雪才情賦
盍與觀梅興味同

只恐春歸有遺恨典刑猶在濁醪中

退食黃堂喜自公不妨幽興囑芳叢雙旌不出閒春晝
大筆微吟綴祖風老矣交朋今日少飄然遊宦異鄉同
杖藜約我過南浦賢聖時時為一中

荔子

炎蒸午枕夢滄浪落落星苞喜乍嘗筆下丹青千品色
釵頭風露一枝香鷄冠借喻何輕許馬乳爭名固不量
直待當時妃子笑驪山千古事淒涼

次施子韻

之子才非碌碌流一官將母海濱遊妙齡意氣看長劍
久客風霜嘆敝裘完璧有懷空慕藺著鞭他日定先劉
岫窓故隱今何在草棘連雲淮楚秋

次韻張守秋懷四首

杖藜乘興出佳處每闕情白石溪流淺黃花籬落清林
煙經雨薄野月傍山明賴有杯中物愁懷得暫平

徙倚山堂晚悲秋萬古情雨蔬猶擢秀風沼自揚清野

迥歸牛小沙寒白鳥明淒淒楓柳樹汝意亦難平

失計縈塵網栖栖厭不情興隨鳬舄遠官比綺曹清大
案韋編古深房紙瓦明聖賢聊晤對事業只平平

歲事何倉卒微吟寄客情野耕方刈熟隣釀已沽清歸
鴈年年急寒烽處處明予衰倦流轉夢想玉階平



屏山集卷十六